

Ескі жылды тарих қойнауына тапсырып, жаңа жылды төрімізге шығаруға санаулы ғана күндер қалды. Жылдың аяқталуы әр пенденің он екі айда атқарған ісіне есеп беріп, жылы естеліктерін еске алып, жіберген қателіктерінен сабақ алатынын білдірмей ме? 2014--Жылқы жылында Жаратқан еліміздің игі жақсылары үшін қандай тосын сый дайындап, қандай сынаққа алды екен? Оны өздерінен сұрап көрейік.

Дархан САБЫРХАНОВ, М.Әуезов атындағы Оңтүстік Қазақстан мемлекеттік университетінің оқу-әдістемелік жұмысы жөніндегі проректоры:

## «Рейтингіміз жоғарылады»



Менің еңбек және ғылым жолымның барлығы осы университетпен байланысты. Сол себепті заңғар жазушының есімін арқалаған оқу ордасының биіктерден көрініп, мәртебелі жоғары оқу орнының біріне айналғанына күш салып келемін. ОҚМУ үшін Жылқы жылы мерейлі жылдардың бірі болды. Себебі, біз әлемдік және республикадағы жоғары оқу орындары арасындағы рейтингімізді жоғарылаттық. Университет қазір еліміздегі беделді, сапалы білім беретін жоғары оқу орындарының үштігінде тұр. Бұл басшымыздың және барша ұжымның, шәкірттердің еткен еңбектерінің жемісі деп білемін. Мен де талай жылғы ізденісімді, зерттеуімді саралап, жинақтап, студенттерге арналған оқулығымды шығардым. Және шетелдік атақты журналдарда төрт бірдей мақалам жарық көрді.

«Немере балдан тәтті» демей ме қазақ. Артымнан еріп келе жатқан ұрпақтарымның әр ісіне демеу болып,

қадамдарына қуанып отырамын. Биыл тұңғыш немерем үлкен өмірге аяқ басып, студент атанды. Қазір Қарағандыдағы медицина академиясында оқып жатыр.

Елбасымыз Н.Назарбаев үдемелі индустриалық инновациялық даму бағдарламасы бойынша ашылған кәсіпорындарға сапалы мамандарды даярлау мақсатында республикадағы жоғары оқу орындарына жаңа мамандықтарды ашуға тапсырма берген болатын. Соның ішінде ОҚМУ келер жылдан бастап жаңа төрт мамандықты оқытатын болады. Университеттің материалдық-техникалық базасын жаңартуға және оқытушылардың білімін одан әрі шыңдау үшін бюджеттен 10 миллиард теңге бөлінді. Мұншалықты қаржы оқу ордасына Қазақстанда бұрын-соңды бөлінбеп еді. Сондықтан, үлкен сенім мен мол қаражат бөлінген іске білек сыбана кірісетін боламыз.